

## **U pas tutuun te koloto menai e Pol turu kristenira i KORIN**

<sup>1-2</sup> Alia e Pol, e Sunahan e ngil sile ii lia tegomi kui mei lia a toukui tere Iesu Kristo. Alam mere Sostenis e toularara e koloto menami u pas teka turu katuun tere Sunahan i Korin te kato hagöagono sila raia tere Iesu Kristo. E Sunahan e ngö sil rai limiou tego katuun uaiam limiou i tanen timar ngö has merai u katuun te hamana ria tere Iesu Kristo tara mamana makum, te hatsunoner e Iesu Kristo, a Tsunono i tarara na i taren has.

<sup>3</sup> A nikalala na masalohana tere Sunahan e Tamarara, na Tsunono e Iesu Kristo e tatei kagono me ranou limiou.

<sup>4</sup> Alia e roron haniga nitöa bera goulimiu tere Sunahan, turu mamana u hitaguhu te hala raien limiou te hamana ua milimiu tere Iesu Kristo, <sup>5</sup> tara mar maroro te habulungana mena milimiu u raranga tere Sunahan, na temar atei sil menari a niatei tere Sunahan na man raranga i tanen.

<sup>6</sup> A niatei ti hala rai lam alimiu e hatei nena te mana uana u raranga tere Iesu Kristo i gusu milimiu. <sup>7</sup> Na limiou ema makmakum nami ta töa ta ka ta niga tere Sunahan te hahaloso mena milimiu a pöata te butu lel nama romana a Tsunono i tarara e Iesu Kristo. <sup>8</sup> Nonei e kato hatagala ranou limiou, bate hamana hatagala mia i tanen ba limiou tema kame moi ta töa ta ka ta omi i tamilimiu tara pöata temi tuol moua limiou i mata nen. <sup>9</sup> E Sunahan e hamanena a ka te katoe

nouen ba nonei te pakoko ranou limiou, u katuun te kagono mer a pien Tson i tanen e Iesu Kristo a Tsunono i tarara.

<sup>10</sup> Alia e ranga hatagala koru meragou limiou tara solona a Tsunono i tarara e Iesu Kristo, alim-iou go haniga hobotoiam batema kats kilkile mi a peisa milimiu. Alimiu go kagono hobotoiam, bate ka memiou u töa puku u hakats na u ngil.

<sup>11</sup> Taraha, a matsi toular, a palair u katuun tere Kloi i hate ii lia, alimiu ema hiakaka haniga mi.

<sup>12</sup> Alia e mar ranga uagu teka taraha, a man tötä i tamilimiu e poeier, “Alia e kukutiegu e Pol,” na palai e poeier “Alia e kukutiegu e Apolos,” tsi “Alia e kukutiegu e Pita,” tsi “Alia e kukutiegu e Kristo.”

<sup>13</sup> E Kristo i lu kaakati? Gesi te mate sil raiau limiou tara kuruse? Alia e Pol? E möa! Ga limiou u habaptais mia tara solona e Pol? E möa koru!

<sup>14</sup> Alia e haniga uagu tere Sunahan alia uma baptaise ii ta töa i tamilimiu. Alia u baptais puku lasir ere Krispus mere Gaius.

<sup>15</sup> Na e möa ta töa tega tatei pei, alimiu i baptais raia tara solor.

<sup>16</sup> (Aa, alia u baptais hasi e Stepanas na u katuun i tanen. Kaba alia ema hakats lel nagi tego baptais mei lia ta tabina ta katuun.)

<sup>17</sup> E Kristo ema hala sile mei lia tegomi baptais merai lia u katuun. E möa. Nonei e hala sile mei lia tegomi hahatei menai lia u Bulungana u Niga. Kaba ema mar niatei uanei temar atei uana a katuun, taraha a kuruse tere Kristo e namots lubanari a nitagala i tanen.

*E Kristo nonei a nitagala na niatei tere Sunahan.*

<sup>18</sup> Pöata te rarare ria ra te mate uu e Kristo tara kuruse, ba u katuun te ka ria tara maroro te la

hatutuna te poeier u raranga i tarara e tutuna. Kaba u katuun te lu pouts raiena e Sunahan e atei siler nonei u töa puku noa lasi u raranga teka te ka mena a nitagala tere Sunahan. <sup>19</sup> E Sunahan e ranga hasna turu Buku u Göagono bate poeiena:

“Alia e kato homie gou a niatei turu katuun u atei.

Na lia e kato hatutu ragou u katuun te poeier nori e atei siler a mamanaka.”

<sup>20</sup> Esi nonei a katuun a atei? Na esi nonei a katuun turu buku? Na esi nonei a katuun a ateina tara Lo tere Mosis? Nori hoboto ema pan ria i matana e Sunahan. E Sunahan e hatei hakapein a niateina tara han i puta, a ka papala koru. <sup>21</sup> Tara niatei i tanen e Sunahan e hatu kapiin a maroro turu katuun te torohanan atei sile ren tara niatei peisa i taren. Kaba nonei e lu pouts rena u katuun te hamana uar i tanen tara pöata te hengoe rien u raranga i tamulam, te ngöeri u katuun, u raranga u tutu. <sup>22</sup> Kaba u Jiu e ngilin tarer tu mirakol, na u katunura i Grik e sakeier ta niatei. <sup>23</sup> Kaba lam e hihatuts nem te mate uu e Kristo tara kuruse. U Jiu ema hanigeri u hihatuts teka, na u katuun tema Jiu ri e poeier, e tutuna. <sup>24</sup> Kaba u katuun te ngöri e Sunahan, u Jiu na u katuun tema Jiu ri, nori e ngiler u hihatuts teka. E haröto nena e Kristo nonei a nitagala tere Sunahan na niatei has tere Sunahan.

<sup>25</sup> A ka te ngöeri “a nitutu tere Sunahan” e pan bala koru nena a niatei turu katuun. Na ka te ngöeri “a nipata tere Sunahan” e pan bala koru nena a nitagala turu katuun.

<sup>26</sup> A matsi toular te ngöri e Sunahan, hakats pouts niam a peisa milimiou. I matar u katunura i puta, ema para nei ti ka mei a niatei, na ema para

nei ti ka mei a nitagala, tsi a solo pan. <sup>27</sup> Kaba u katuun te ngö rari u tutu, e Sunahan e hopö kap sil raien tego hamatsingolo meraien u katuun u atei. Na u katuun te ngö rari u pinolasa, e Sunahan e hopö kap sil raien tego hamatsingolo meraien u katuun u tagala. <sup>28</sup> E Sunahan e hopö kapid u katuun te sigala raier na te omi raier na te ngörari u katuun papala. Taraha, nonei e ngilin haka puta raiena a manka te haka seier u katunura i puta. <sup>29</sup> Te kato uanen teka e möa nou ta töa tego tatei soloseia a peisanen i matana e Sunahan. <sup>30</sup> Tere Sunahan lahas bara te ka ria tere Iesu Kristo, na nonei e habutu sileien tego hala meraien ra a niatei. E Kristo nonei te sakahis raioura bara te katuun uara tere Sunahan. Nonei lasi a maroro a matskö na nonei te kato hagöagono raioura bara te katuun uara tere Sunahan. <sup>31</sup> Na i koloto hasiin, “Esi te ngilin soloseiena ta ka e tatei soloseiena a Tsunono.”

## 2

### *U hihatutsina te mate uu e Kristo tara kuruse*

<sup>1</sup> Tara pöata tu lama lia i tamilimiou, a matsi hahatoulana, alia uma la memei u raranga u mola tsi u mar raranga tara katuun a atei temi habulungana naia lia u raranga tere Sunahan. E möa. <sup>2</sup> Alia uma ngilin ranga nai ta taina ta ka kaba lia u ngilin hatagali e Iesu Kristo i gusumilimiou na saha ka te mate sileien tara kuruse. <sup>3</sup> Na pöata tu kaia lia i tamilimiou, alia uma tagala ii na lia u toltololo mei a nimatout. <sup>4</sup> A man raranga na man hihatuts i tar ema tagala ii tego tuke menaien a katuun. E möa. U raranga i tar e harötein a nitagala turu

Namnamei tere Sunahan. <sup>5</sup> A ka teka i kato sila naia alimiou goma hamana mia tara niatei turu katuun, kaba limiou go hamana mia tara nitagala tere Sunahan.

<sup>6</sup> Alia e ranga noa has megu a niatei turu katuun te atei siler a markato tere Sunahan. Kaba ema ni-atei uanei tara han i puta teka tsi tara pal kapanira i puta te taia riou romana. E möa. <sup>7</sup> Kaba a niatei te ranga nemu lam nonei a niatei tere Sunahan te mous i manasa. Na a niniganiga tere Sunahan e haka beraien ra i mamuna te taniaia a pöata. <sup>8</sup> U tsunono panira i puta ima atei sile ii a manka teka. Sanena nori ti atei sileien, ba nori tema antunan nila nari a Tsunono Pan i tarara tara kuruse. <sup>9</sup> U Buku u Göagono e mar ranga uana teka:

“A ka ti namala tare ii u katuun  
na tima hengo naien  
na tima hakats has naien,  
nonei a ka te kato hahaloso berai e Sunahan u  
katuun ti ngileien.”

<sup>10</sup> A mamanaka teka e Sunahan e haröto sila raien ra turu Namnamei i tanen. Taraha u Namnamei e tara sabiena a mamanaka tara mamana makum na e tara sabe hasena a mouna a manka tere Sunahan te mousuna. <sup>11</sup> Esi i gusuna u katuun te atei silena temar hakats uana a katuun? U namnamei peisa lasi tara katuun te atei silena u hakats i tanen. Na e markato has uana iesana tere Sunahan. U Namnamei peisa has tere Sunahan te atei silena u hakats tere Sunahan. <sup>12</sup> Ara ima lue ii u namnamei tara han i puta teka. E möa. Ara i lui u Namnamei te lama tere Sunahan tegi tatei atei sil menai ra a manka te hala raira e Sunahan.

<sup>13</sup> Ba lam tema ranga nami u raranga tara niatei turu katuun tuun. E möa. Alam e ranga nem u

raranga te hatuts railam u Namnamei tere Sunahan bate hatarare nem a manka tere Sunahan turu katuun te ka mer u Namnamei tere Sunahan. <sup>14</sup> A katuun tema ka menei u Namnamei tere Sunahan ema tatei lue nei a manka te hala nena u Namnamei tere Sunahan. Turu hakats tara katuun teka, a manka tere Sunahan e here nei a manka man tutu. Nonei a katuun ema antunan atei sile neien, taraha u Namnamei lasi tere Sunahan te antunan haröto nena a mouna a manka teka. <sup>15</sup> A katuun te ka mena u Namnamei tere Sunahan e antunan sabiena a mouna a mamana, kaba tana mar katuun ema antunan atei haniga sile neien.

<sup>16</sup> U Buku u Göagono e mar ranga has uana teka: “Esi te atei silena u hakats tara Tsunono? E möa. Esi te antunan hatutse neien ta ka? E möa koru.”

Kaba ara e ka mera u hakats tere Kristo.

### 3

#### *U katunun kui tere Sunahan*

<sup>1</sup> A matsi hahatoulana, alia uma antunan ranga uai i tamilimiou temar ranga uagu lia turu katuun te kukutier u Namnamei tere Sunahan. Alia u ranga uu i tamilimiou te tatei ranga uagu lia turu katuun te ka las mer u hakatsina i puta. <sup>2</sup> Alia u haua railimiou u ramununa tara sus, ema kannou a tiama nei. Taraha, alimiou uma antunan nou noe mi a kannou a tagala.\* I romana noahas alimiou ema antuna noahas mi. <sup>3</sup> Taraha, alimiou e ka here noahas mi u katunura i puta. Alimiou e hiomor miou na e hia o omi miou na e hiangenngena hasmiou. A markato teka e haröto

---

\* **3:2:** U haharueina turu hihatuts u tagala na turu namnamei.

nena alimiou e ka noa las mia tara markatona i puta. <sup>4</sup> Taraha, te pei a tōa i tamilimiou, “Alia e kukuteiegu e Pol” na tabi e poeiena, “Alia e kukuteiegu e Apolos,” alimiou e kato here rami u katunura i puta.

<sup>5</sup> Ere Apolos mere Pol, u saha u mar katuun? Alam u katunun kui tuun tere Sunahan tu hatuts railimiou tego hamana uaiam limiou i tanen. Alam a man tōtōa e katoeiem a man toukui te hala railam e Sunahan. <sup>6</sup> Alia u lebi a kannou be Apolos tena haramun ranen. Kaba e Sunahan lasi a tōa te katoeiena a kannou bate pusuku hanigana. <sup>7</sup> A katuun te halebana, na katuun te haramununa ema pan ri. Kaba e Sunahan lasi a tōa te panina, taraha nonei te taguhena a mamanaka bate pan haniga susulur. <sup>8</sup> A katuun te halebana na katuun te haramununa e kuieier a tōa puku a toukui. E Sunahan e hol ranoien a man tōtōa, e antunana timar kui hapopo uaien. <sup>9</sup> Alam u katunun kui hoboto tere Sunahan. Alimiou a kui i tanen na luma has i tanen.

<sup>10</sup> Tara nitagala tere Sunahan te haleien lia, nonei e hale ii lia a niatei tego kui mei lia a luma a niga, na lia u haka hakapi u pos simen tara luma. Kaba a taina katuun te kuienou a luma ieluna u pos simen. A man tōtōa man katunun kui teka egi harare haniga koruni temar kui menaroiien a luma. <sup>11</sup> Taraha, e Sunahan e haka hakapi e Iesu Kristo, nonei puku lahas a pos simen, na e möa lel ta taina ta pos simen tegi tatei hagumeiou. <sup>12</sup> U katuun e tatei kuieri u luma i taren a goul tsi a silva na u hatu u niga, na u timba na u rue ti sis tuni na uotoho. <sup>13</sup> Taraha, turu Lan Pan tere Kristo, ba toukui turu katuun hoboto te harōto naria

romana turu ualesala. U tula te haröto nanou a toukui turu katuun hoboto, na u tula noahas te torohane nou a saha mar toukui ti katoi a man tötöa man katunun kui. <sup>14</sup> Tema kulupenoi u tula aha ti kuieia ioluna a pos simen, e Sunahan e hale noi a katuun te kuieien u hamatana i tanen. <sup>15</sup> Te kulupu noa a toukui teka, e Sunahan ema hale noi a katuun te kuieien u hamatana i tanen, kaba nonei e ka noahas menou a nitöatöa te ka nitöana te haleien e Sunahan. Nonei e here noi a katuun te lakasama turu tula kaba mamananaka i tanen e kulupu hakapa.

<sup>16</sup> Alimiou e atei sil hase miou alimiou u luman lotu tere Sunahan na u Namnamei tere Sunahan e kana i tamilimiou? <sup>17</sup> Te kato homie noa ta töa ta katuun a luman lotu tere Sunahan, e Sunahan e kato homi hase nou a katuun teka. Taraha a luman lotu tere Sunahan e göagonona, na limiou u luman lotu i tanen.

<sup>18</sup> Alimiou goma gamoemi a peisamiou. Te peiena a töa i tamilimiou nonei e atei koruna tara markatona i puta, nonei e tatei kato here nanei a peisanen a katuun a tutu, ba nonei te töan luena a niatei hamana. <sup>19</sup> Taraha, a niateina i han i puta teka e tutuna i matana e Sunahan. U Buku u Göagono e pei hasena, “E Sunahan e kato homi mera nei u katuun u atei a man niatei pouts i taren.” <sup>20</sup> Na u Buku u Göagono e mar ranga has uana teka, “A Tsunono e atei silena u hakats turu katuun u atei, a manka pinopino.” <sup>21-22</sup> Na e möa ta töa tega tatei solosei u katuun te mam mamir. Alam na mamananaka e ka hoboto uam i tamilimiou, alia e Pol na e Apolos na e Pita na han i puta teka na nitöatöa na tou mate na pöata i romana na pöata has i murimuri. A manka hoboto



teka e ka uaier i tamilimiou. <sup>23</sup> Na limiou e ka has uamiou tere Kristo, na e Kristo e ka has uana tere Sunahan.

## 4

### *U aposol tere Kristo*

<sup>1</sup> Alimiou go mar tara mera milam teka, alam u katunun kui tere Kristo, ti hapepeito kap rai a man raranga tere Sunahan ti mous i manasa. <sup>2</sup> Kaba a toukui teka e ngilena a katuun a hihipakoko na katuun te hamana uana tere Sunahan na te kukuteiena u raranga i tanen. <sup>3</sup> Kaba i tar, a ka a tetenei koru tego ona mei lia limiou. Alia ema hakats hapara nagi temar hakats uana a tana katuun. Na lia ema tatei ona pouts hasegi a peisar. <sup>4</sup> Alia ema hakats sabe nagi ta töa ta ka ta omi tu kati lia, kaba a ka teka ema haröto nanei tego möa menai lia ta ka ta omi. A Tsunono peisa nonei te one noulia. <sup>5</sup> Na limiou goma ona rami u katuun i mamuna a pöata tena la nama romana a Tsunono. Nonei te ona hamatsköe nou a manka te mousna turu kuhil bate hakei nouen turu ualesala, bate haröto has nanou u hakats turu katuun. Be Sunahan te hala ranoui u katuun hoboto u rangan haniga i taren.

<sup>6</sup> A matsi hahatoulana, a man raranga teka te kato beregu lei lia limiou e hatei nena e Apolos na lia. Alimiou go röteiam a markato i tamulam bate kukute hasemiou u Buku u Göagono. Alimiou goma soloseiemi a töa bate omiemiou a tabi. E möa. <sup>7</sup> Esi te haka sil rai limiou go pan naiam a tabi? E Sunahan te hala railimiou a manka hoboto te ka memi limiou. Na limiou goma ranga seseimi

bate peimiou, tara nitagala i tamulam peisa ba lam te ka mem a manka te ka memu lam. E möa.

<sup>8</sup> Turu hakats i tamilimiou, alimiou e peimiou, “Alam u ka hakapa mei a manka tere Sunahan. Alam ema ngil lenemi taka.” Alimiou e peimiou alimiou e heremi u king tara nipepeito tere Sunahan bate mam ramou lam. Alia e ngilegu alimiou go king hamanaiam, ba lam te tatei tsunono hoboto gono mera moulimiou. <sup>9</sup> Kaba e Sunahan e haka raia lam u aposol i murimuri koru, bate heremi u katuun ti hopö kap merai tegi mate uaïen. Alam e heremi a kaan hiharöto te haröto naria turu katuun na turu angelo has. <sup>10</sup> Alam e heremi u katuun u tutu i matara u katuun te hengo mena milam e Kristo, kaba e noahasina alimiou u katuun u atei tere Kristo. Alam ema tagalami, kaba e noahasina alimiou e tagala korumiou. U katuun e sigala rariou lam bate hapan rariou limiou. <sup>11</sup> I romana noahas alam e besim na e maka hasim. A man hasobö i tamulam e taktakiis hakapa. Na u katuun e muku rariou lam. Na lam e hula lam bate möam ta luma. <sup>12</sup> Alam e kui hatagala silem a monin kannou i tamulam. Na pöata te ranga homi ria u katuun i tamulam, ba lam te ranga haniga mia i taren. Na te kato homi ria u katuun i tamulam, ba lam tema raharahami. <sup>13</sup> Na pöata te tuts sil rarien lam, alam e ranga hatami tuun mia i taren. Kaba u katuun e kato here noahas rari lam a bita na manka te ba ner.

<sup>14</sup> Alia ema mar koloto uagi teka tego hamatsingolo merai limiou. E möa. Alia e mar ranga uagu teka tego hatuts merai limiou, a matsomi i tar. <sup>15</sup> Noahasina te ka memia limiou a parpara koru a katuun te tatei hatuts rari limiou e Kristo,

alimiou go hakats pouts naiam alia puku a töa i tamamilimiou. Taraha, alia u butu here ii e tamamilimiou tara pöata tu hatuts naia lia u Bulungana u Niga bate taguhu ragou limiou tego hamana uaiam limiou tere Iesu Kristo. <sup>16</sup> Na lia e ranga hataatagi uagu i tamilimiou, alimiou go kukuteiam a markato i tar. <sup>17</sup> Na lia e hala menagi e Timoti i tamilimiou, a pien tson\* a tsomi koru i tar te ngil korue gulia na te hamana gono menou lia tara Tsunono bate tara kap haniga nena a toukui tara Tsunono. Nonei ena hatei lel ranoui limiou a markato i tar te kukute mena gilia e Kristo, te hatuts has nagia lia turu katuun hoboto tere Kristo tara mamana han.

<sup>18</sup> A palai i tamilimiou e hipusur bate poeier alia ema antunan na hamatskö ragi limiou. <sup>19</sup> Kaba alia e la hasesei uagou i tamilimiou tega ngil u a Tsunono. Ba lia tena tara peisa gou tegi ka menai u katuun u hihipus a nitagala tega popoia turu ranga i taren. <sup>20</sup> Taraha, a mouna a Nipepeito tere Sunahan ema ka neia turu ranga, kaba e kana tara nitagala. <sup>21</sup> Alimiou e ngilemiou aha? Alia go la mema a niomi i tamilimiou tsi alia go la mema u ngil na u tori tami i tamilimiou?

## 5

### *A tson te kato homi koru*

<sup>1</sup> Alia u hengoin u ranga te poeiena a töa i gusumilimiou e katoena a markato a omi koru tema tatei kato haseri u tematan. U raranga e poeiena a töa tson e sösoho gono mena a tahol tere

---

\* **4:17:** E Timoti ema pien hamatskö uanei tere Pol, nonei e Pol te las meien tara maroro a niga.

tamanen. <sup>2</sup> Alimiou e masa koru las memiou a markato teka te kana i tamilimiou? Alimiou go tabe meiam a nimatsingolo. A tson te kato homina egi tsuga banaia tara han i tamilimiou. <sup>3</sup> E manana, a peisar e ka halehana ba renou limiou, kaba u namnamei i tar e kana i tamilimiou, bate here nei alia e ka gono mera goulimiou. Na lia u hopö kap hakapein a nihahuna tara katuun te kato a markato a omi koru teka. <sup>4</sup> Alimiou go hagum hobotoiam tara solona e Iesu a Tsunono i tarara, ba namnameir tena ka gono mera noulimiou na nitagala has tere Iesu a Tsunono i tarara. <sup>5</sup> Na limiou go hakei mia a katuun teka i limana e Satan tegi kato homi menai a peisanen na markato a omi i tanen, be Sunahan te tatei lu poutsena romana u namnamei i tanen turu Lan Pan tara Tsunono i murimuri.

<sup>6</sup> A nimasa i tamilimiou ema niga nei. Alimiou e atei silemiou u raranga te poeiena, “A tsitabubun is e hapanena a beret hoboto.” <sup>7</sup> Na limiou go ba neiam a markato a omi te here nei u is, ba torimilimiou te tatei gogosona, ti kato has uu Jiu ti roron ba has menaien u is i mam tara kannouna turu Paska ba nori te töan gogosor. Na e here has nei ara e ka hamanasa ria tara kannouna turu Paska, taraha e Kristo e markato uana tara tunan sipsip ti haatsi, e mate sil tego luba menaien a man markato a man omi i tarara. <sup>8</sup> Na ragi ban a man markato a man omina i manasa ba torirara te gogosona bara te ranga nera u mana.

<sup>9</sup> Alia u koloto mam uala i tamilimiou, me hatei ragule limiou tegoma ka gono mera milimiou u katuun te katoeier a markaton tsikolo na tahol a lulu tson. <sup>10</sup> Alia uma ranga nai u tematan te

tsiktsikolor tsi te gono beri a peisaren a manka na u kopkop na u katuun te hatsunoner u kesa. E möa. Sanena limiou goma ka gono merami u mar katuun teka, ba limiou te laba namiou a han i puta.

<sup>11</sup> Alia u rangein tegoma ka gono mena milimiou a katuun te ngöe nei a peisanen e toularara bate tsikolona tsi e gono benei a peisanen a manka na e hatsunonena u kesa na e tuts silena a tana katuun na e roron spakina na e kopkopina. Alimiou goma nou gono has memi a mar katuun teka.

<sup>12-13</sup> E ma ka uanei i tar tego ona merai lia u katuun te hahamanar. E Sunahan te ona ranouen. Kaba limiou go tsimou reiam u katuun te hamanar te pala uaier i tamilimiou. Na limiou go tsuga ba naiam a katuun a omi i gusumilimiou.

## 6

*E möa tegi hia kokout uu kristen i matar u katuun tema kristen ri.*

<sup>1</sup> Te raharahena a töa i tamilimiou a tana kristen, e hana, nonei e kout nanen tara tsonun ona a tematan batema la meneien turu palair u kristen? A hun katuun tere Sunahan te tatei hakaper a raharaha teka. <sup>2</sup> Alimiou e atei sil hasemiou u katuun tere Sunahan ena ona rer romana u katunura i puta? Aa. Na temar kato uaieren teka, ba limiou te antunan hakapa korue miou a matsi raharaha teka. <sup>3</sup> Alimiou e atei sil hasemiou ara ena ona has rariou u angelo? Ga e hana ba ra tema antunan hamatskö korueri a mamana i puta teka? <sup>4</sup> Te butuna a hia raharaha i gusumilimiou, e hana balö tena tareiem a katuun tema tara mareieri u kristen? <sup>5</sup> Alia e ranga megia a ka teka tego hamatsingolo merailia alimiou. E möa

koru lasi ta töa i gusumilimiou u kristen tega ka mei ta niatei tega ona menaien a raharaha tara huol a katuun? <sup>6</sup> Kaba limiou ena kout namiou u hahatoulana i tamilimiou bate haniga namiou tega ona menaien a tsonun ona tema kristen nei.

<sup>7</sup> Alimiou goma hiakokot nami a tabi. A markato teka e haröto nena alimiou u rus hakapa ba naiam a markato turu kristen. E niga bala nena tegi kato homi merai limiou u katuun na tegi kop uaien i tamilimiou. <sup>8</sup> Kaba e möa, alimiou pouts e hia katokato homi miou na e hia kopkop hasmiou, bate katoemiou a man markato teka turu kristen, a man hahatoulana pouts i tamilimiou.

<sup>9</sup> Alimiou e atei sil hasemiou u katuun te kato homir ema tahongo ria tara Nipepeito tere Sunahan? Alimiou goma gamoemi a peisa milimiou. U katuun u tsiktsikolo na u katuun te hatsunoner u kesa na pal tson te hiasesein tsonur na touhaliou te hiasesei poutsur ema tatei tahongo has ria tara Nipepeito tere Sunahan. <sup>10</sup> Na u kopkop na u katuun te gono beri a peisaren a manka na u katuun te roron spakir na u katuun te tuts siler a tai ema antunan tahongo has roi tara Nipepeito tere Sunahan. <sup>11</sup> A palai i tamilimiou i kato has uu teka i manasa. Kaba e Sunahan e galus hakapa ban a man markato a man omi i tamilimiou bate hagöagono ranou limiou. Nonei e kato hamatskö sila raia limiou tara solona e Iesu Kristo a Tsunono na turu Namnamei tere Sunahan i tarara.

*Solosei memi e Sunahan u tuenrei i tamilimiou*

<sup>12</sup> A palai i tamilimiou e pei riou, “E nigana te kato mena gilia a mamanaka.” Kaba, a palaina manka ema taguhe noi lö. “E nigana te kato mena

gilia a mamanaka.” Kaba lia ema haka pute goi a peisar ta töa ta ka.\* <sup>13</sup> Na palair u katuun e poeier, “A kannou e ka silena u tori, na u tori e ka silena a kannou.” U mana, kaba e Sunahan e kato hataie nou romana a kannou na u tori has. A tuenriena katuun ema ka sile nei egi tsikolein. E möa. E ka silena tego solosei menaien a Tsunono, na Tsunono e ka silena tega taguhu menaien a peisarara. <sup>14</sup> E Sunahan e hatakei poutsi a Tsunono tara tou mate, na nonei e hatakei pouts has ranoua ra tara tou mate tara nitagala i tanen. <sup>15</sup> Alimiou e atei sil hase miou u tuenrei i tarara, e pala uana tere Kristo? Alimiou e ngilemiou alia go lui a töa makumun tuenrei tere Kristo bate katoe gien a töa pala turu tuenrei tara tahol a lulu tson? E möa, me möana! <sup>16</sup> Alimiou e atei sil hase miou, a tson te kaka gono mena a tahol a lulu tson e katoe riou u töa u tuenrei? I ranga hasiin, “A huol e katoe riou u töa puku u tuenrei.” <sup>17</sup> Kaba a katuun te ka gono mena a Tsunono, nori e ka hoboto ria turu töa puku u namnamei.

<sup>18</sup> Bus ba naiam a markaton tsikolo. A palaina markato a omi te katoena a katuun e ka puku na ielesala turu tuenrei. Kaba a katuun te tsikolona e kato homiena u tuenrei i tanen pouts. <sup>19</sup> U tuenrei i tamilimiou a luman lotu turu Namnamei u Göagono te kana i tori milimiou, u Namnamei te halani e Sunahan. U tuenrei i tamilimiou ema ka uanei i tamilimiou. E möa. E ka uana tere Sunahan. <sup>20</sup> Taraha, nonei e sakahis rai limiou a hihol pan. Alimiou go solosei memi e Sunahan u

---

\* **6:12:** A huol a pöata tara ves teka e Pol e hala nena u hakhakats tara tana katuun ba nonei te töan hala nena u hakhakats i tanen.

tuenrei i tamilimiou.

## 7

### *U hihatutsina tara hitöl*

<sup>1</sup> Turu harangata tu koloto mena mumei limiou i tar alia e poeiegu, “E nigana tegoma soho gono menai a tson a tahol.” <sup>2</sup> Kaba te katoe ria u katuun a markaton tsikolo, a mamana tson ega ka hamanasa mei a tahol i tanen na mamana tahol ega ka hamanasa mei a tson i tanen. <sup>3</sup> A tson ega kui a toukui te tölo sileien a tahol na tahol ega kui hasi a toukui te tölo sileien a tson. <sup>4</sup> U tuenrei tara tahol a manka tara tson i tanen na u tuenrei tara tson a manka tara tahol i tanen. <sup>5</sup> Möa tu peits nai a hahikapien i tamölö a peisamölö, kaba turu hia hanhaniga i tamilimiou ba limiou tema tatei hiakaka gono bumi bate singo hatagala uamiou tere Sunahan, ba limiou te töan ka gono pouts lel mou. E Satan ena mots torohana ranou limiou bate tara haroho miou. <sup>6</sup> Alia e hala tuun ragi limiou u raranga, alia ema tahul ragi limiou. <sup>7</sup> Alia e ngil koruegu alimiou hoboto ego here milia. Kaba a man tötäa i tarara e ka mer a man nitagala te hala raien e Sunahan. A palai e kato hanigar tegi kaka puku uaien, na palai e kato haniga hasir tegi hitöl uaien.

<sup>8</sup> Turu katuun tema hitöl noa ri na u amoaba, alia e poegu, e niga koruna alimiou goma hitöl mi te markato has uagu lia. <sup>9</sup> Kaba tema antunan tagala namia limiou u ngil turu tuenrei, ba limiou te hitölmiau. E niga bala nena alimiou go hitöl iam, alimiou na mots hengoe miou u ngilngil turu tuenrei i tamilimiou.



<sup>10</sup> U raranga u tagala teka e hala menagi lia i tamilimiou u katuun u hitöl, ema ranga uanei i tar. U raranga noahas tara Tsunono tara pöata te ka len i puta. A tahol egoma la banai a tson i tanen.

<sup>11</sup> Kaba te laba nanen a tson i tanen, nonei ma tatei töle nei a tana tson. Te ngil nen ba nonei tena lu poutsena a tson i tanen. Na tson goma laba hasnai a tahol i tanen.

<sup>12</sup> A Tsunono ema ranga nai a ka teka, kaba alia peisa te ranga nagen i tamilimiou, te tölena a tson te hamanana a tahol tema hamana nei kaba a tahol e haniga nena tego ka gono menaien, a tson ema antunan laba nanei a tahol teka. <sup>13</sup> Na te tölena a tahol a tson tema hamana nei ba tson te haniga nena tego ka gono menaien a tahol i tanen te hamanana, a tahol ema antunan laba has naneien. <sup>14</sup> Taraha, a tson tema hamana nei e kato hagöagono sila naria tara tahol te hamanana na tahol tema hamana nei e kato hagöagono sila naria tara tson te hamanana. A galapien i tamilimiou ena mots ma gogoso ri, kaba tara markato teka ba galapien i tamilimiou te göagono hasir.

<sup>15</sup> Kaba te laba nena lö a hahikapien tema hamana nei, haka ban, alö ema kits mia turu hamalina tara hitöl. Kaba e Sunahan e ngö sil railimiou u mun tahol tego ka hoboto haniga uaiam limiou. <sup>16</sup> Alimiou u touhaliou te hamana miou, alimiou toum te taguhu ramou a pal tson i tamilimiou te hahamanar, ba nori te habirits uariou tere Sunahan. Na limiou a pal tson te hamana miou, alimiou toum te taguhu ramou a touhaliou i tamilimiou te hahamanar, ba nori toum te habirits has uariou tere Sunahan.

*Alimiou go marka uaiam te ngö merai limiou e Sunahan*

<sup>17</sup> Alimiou a man tötöa ego marka uaiam temar ngil mena milimiou a Tsunono, na temar ngö mena milimiou e Sunahan. Nonei teka temar hatuts mera gilia u katuun hoboto tere Sunahan. <sup>18</sup> Hena, esi i tamilimiou te hapö hakapa tara pöata te ngöe ien e Sunahan, nonei goma matsingolo meien bate hamouse nen. Na esi i tamilimiou tema hapö noai tara pöata te ngöeien e Sunahan, nonei goma torohanan hapö i romana. <sup>19</sup> Taraha, u hapö na tema hapö uamilö a ka tetenei koru. A ka lasi te pan koruna, tegi hengo haniga menai ra u raranga tere Sunahan. <sup>20</sup> Alimiou go mar ka uaiam tu mar ka uaiam limiou tara pöata te ngö raia limiou e Sunahan. <sup>21</sup> Hena, ti katunun kukui puku ia lö tara pöata te ngöeia lö e Sunahan möa tu hakats haparani. Kaba te hapurese na lö a tsunono i tamölö u niga bala, lui. <sup>22</sup> A katunun kukui puku te ngöena a Tsunono e here nei a katuun te tapurese hakapaia i matana a Tsunono. Na katuun tema katunun kukui pukui tara pöata te ngöeien e Sunahan e here tale nei a katunun kukui puku tere Kristo. <sup>23</sup> E Sunahan e sakahis railimiou a hihol pan. Ba limiou tema tatei katunun kukui puku uami tara katuun tuun. <sup>24</sup> Na matsi hahatoulana, a man tötöa hoboto i tamilimiou e tatei mar ka uaiar ti mar ka uaien tara pöata te ngö raia limiou e Sunahan, ba limiou te ka mia tere Sunahan.

*U hihatutsuna turu katuun u tabuna hitöl na u amoaba.*

<sup>25</sup> Alia u möa tu ranga tu tagala tara Tsunono te hatei nena u katuun u tabuna hitöl. Kaba a Tsunono e taatagi nanou lia bate hamane noulia. Na lia e hatei rahi limiou u hakats i tar. <sup>26</sup> Tara pöata a omi teka alia e poeiegu, alimiuu go marka uaiam te mar ka uamilimiuu. <sup>27</sup> Te ka memialö a tahol, möa tu la bani. Tsi te kaka puku mialö, möa tu sake ta tahol. <sup>28</sup> Kaba te hitöl moua lö, alö ema kato homi mulei. Na te hitöl noua a kukubei, nonei ema kato homi has nei. Alimiuu ena la moua ta maroro a gagas turu puta teka tena hitöl moua limiou, na lia ema ngilegi tego butu uu a man nomi teka i tamilimiuu.

<sup>29</sup> A ma tsi hahatoulana, u raranga i tar e mar mouna uana teka: a pöata i tarara i puta e makmakumuna. Na e möa ta ka tego tatei hatu kap ba rai limiou u ngilngil tere Sunahan. A katuun a hitöl goma hakatsin töapala nai a hitöl, kaba ega hakats hasiin a toukui tara Tsunono tego mar hakats has uu a katuun a tabuna hitöl. <sup>30</sup> Na u katuun te taber egi kato here ii u katuun te sasaalar. Na u katuun te sasaalar egi kato here ii u katuun tema sasaala ri. Na u katuun u holhol ka egi kato here ii u katuun tema ka meri ta ka. <sup>31</sup> Na u katuun te katoeier a man toukuina i puta, egima pile hakarapoto nai a mankana i puta. Taraha, a markato tara han i puta teka e sulusukun taiana.

<sup>32</sup> Alia e ngilegu alö goma hakats hapara nai a mamananana i puta. A tson tema hitöl nei e hakats koru nena a toukui tara Tsunono, taraha nonei e ngilin hasasaalena a Tsunono. <sup>33</sup> Kaba a tson a hitöl e hakats koru nena a mankana i puta, na ime temar hasasaala menoien a tahol i tanen. <sup>34</sup> Na u ngilngil i tanen e lakatana tara huol

a ka. A tahol tema hitöl nei na tahol a kukubei e hakats koru ner a toukui tara Tsunono, taraha nori e ngiler a peisaren na u namnamei i taren ega nigaia i matana a Tsunono. Na tahol a hitöl e hakats koru nena a man kana i puta, taraha nonei e ngilin hasasaalena a tson i tanen. <sup>35</sup> Alia e mar ranga uagu teka taraha, alia e ngilin taguhu ragou limiou. Alia ema hapiou ragi limiou. E möa. Alia e ngil lasegu alimiu go katoeiam a manka te nigana, ba peisa milimiu hoboto te ka nitöa uana tara Tsunono.

<sup>36</sup> Ti hapous kap naia a tson na tahol, a tson ema tatei kato homi nei. Na te tagala koruna u ngil tara tson, ba nonei te tatei katoena a ka te ngile nen bate tölena a tahol. A ka teka ema omi nei. Hahitöl raiam <sup>37</sup> Kaba te tuol hakarapotona a tson turu hakats i tanen batema kukute nei u ngil tara tana katuun, nonei e kits hakapi u hakats i tanen tegoma hitöl menaien a tahol i tanen, nonei e kato hanigana. <sup>38</sup> Te markato uanen teka, a tson te tölena a tahol i tanen e kato hanigana, kaba a tson tema hitöl nei nonei te kato haniga balana.

<sup>39</sup> A tahol e kits mena tson i tanen tara pöata te tötäa noa na a tson i tanen. Kaba te matena a tson i tanen, ba tahol te tatei hitöl mena tana tson tega ngil uaien. Kaba nonei ega hitöl mei a tson te hamanana. <sup>40</sup> Kaba turu hakats i tar a tahol teka e sasaala koru has nou tego kaka puku uaien. Na lia e poeigu u Namnamei tere Sunahan e haniga hasina.

## 8

*A kannou ti haats naia u kesa*

<sup>1</sup> Tara kannou ti haats nai u kesa alimiou e poeimiou, “Alam hoboto e atei silem a ka te matsköna.” Kaba a niatei tuun te kato ha hihipusena a katuun. A markato te ngil menari a tana katuun nonei te taguhena a katuun. <sup>2</sup> A katuun te poeiena e atei koruna ema atei haniga sil noe nei a manka. <sup>3</sup> Kaba a katuun te ngil hamanena e Sunahan, e Sunahan e atei sile nouen.

<sup>4</sup> Bora, tegi nou menaira a kannou te haats nari u kesa, ara e atei silera e möa tu kesa tega mana kaba e Sunahan puku a töa. <sup>5</sup> E manana, u katuun e poeier e ka mena a got na tsunono a parpara i Kolö na i puta. <sup>6</sup> Kaba ara u kristen e hamana ria tara töa puku a Got, nonei e Sunahan, e Tamarara te habuti a mamananaka, na ra e hamane ren. Na e ka has mena a töa puku a Tsunono, nonei e Iesu Kristo. E Sunahan e habutu sila naia a mamananaka i tanen, na ra e ka ria tara nitagala tere Kristo.

<sup>7</sup> Kaba para a katuun ema atei silenei a ka teka. Taraha nori e hakats noa has naier u kesa. Na pöata te noue rien a kannou turu haats, nori e poeier u haats tara got hamana. Nori e hakats hapara ner a ka teka ba a tsitabubun hakats i taren te omina. <sup>8</sup> A kannou ema las hasusuku mera noi ra tere Sunahan. Tema noe roira a kannou na te noe rouara a kannou ema kato haniga ranoui ra i matana e Sunahan. E möa.

<sup>9</sup> Kaba hakats hanigaiam a niatei i tamilimiou ena mots kato homiena a katuun, ba u hakats i tanen tema tagala balanei banonei te rus uana tara markato a omi. <sup>10</sup> Taraha, te tare roua lö, alö te kamem a niatei e nou mia iahana luman lotu turu kesa, ba nori te ngilin nou hase riou a kannou te haats ba naria turu kesa. <sup>11</sup> Ba tara niatei i

tamölö ba u toulamölö te mate silir e Kristo, u nihamana i taren tema tagala lel talanei e kato homi taleier. <sup>12</sup> Te markato uamölö teka turu toulamölö, alö e kato homi mia i matana e Kristo, taraha alö e kato hapieiem ats tabubun nihamana te kame ren. <sup>13</sup> Te kato homie na a markato tara kannou e toular, alia ema tatei nou lenegi u benö. Alia ena mots kato homiegi e toular a markato tara kannou teka.

## 9

### *A manka te matsköna tara aposol*

(U hanhanigana turu aposol)

<sup>1</sup> Alia a aposol, alia u tara hakapi e Iesu a Tsunono i tarara, na nonei e purese ba hakapein a kits kap i tar tara markato a omi. Alia u taguhu raiou limiou bate hamana uamiou tara Tsunono. Alimiou a kannou tara nikukui i tar. <sup>2</sup> Tema aposol gia lia tara palair u katuun, e nigana alimiou e atei silemiou alia a aposol. Alimiou a nihiharöto te aposol uagulia tara Tsunono, tu taguhu merai lia alimiou bate hamana uamiou tara Tsunono.

<sup>3-4</sup> A palair u katuun e roron ngilin sake ner ta markato ta omi i tar, ba lia temar ranga uagu teka: gema niga nei te hala merari u katuun a kannou na kaan ua i tamulam te rarare uamulam i taren? E möa, e nigana. <sup>5</sup> Ge ma niga nei tego tataala gono menai lam ta tahol ta kristen te markato uaier a palair u aposol na u toulana has a Tsunono, na e Pita has? <sup>6</sup> Ga lam peisa mere Banabas ema tatei hakapemi a toukuin moni i limamulam bate lu hasem a monin hitaguhu temar lu has uaier a palair u aposol? E möa, alam e tatei hakapam tego ngil uu lam. <sup>7</sup> A soldia e hol poutseiena a peisanen

te kato mena neien a toukui tara soldia? E möa koru. Na limiou ema tatei ranga has uami teka tara katuun te lebei a kuin grep, “Alö ema tatei nouemi u grep i tamölö.” E möa. Na katunun pepeito kap turu sipsip na u meme e tatei lu hasna tara man sus i taren.

<sup>8</sup> E ma ranga puku uanei tara mar katuun te kato uana teka. E möa. U raranga tere Sunahan e markato has uana iesana. <sup>9</sup> I koloto naia tara man Lo tere Mosis, “Alö goma kopo kapnai a runguna bulmakau te pita patspatsike nen u wit. Nonei e tatei nou hasina tara pöata te kui nen.” E Sunahan e hakats talasin a bulmakau tuun? E möa. <sup>10</sup> Nonei e ranga has raoulam. Ba nonei e poeiena u katuun e tatei hol haser a katunun taratarakap turu lotu tara toukui i tanen. A katuun te lebe iena a kui e kui silena tego lu menaien a hapalan kannou, na katuun has te gala menama a kannou.

<sup>11</sup> Tu hihatuts nai lam u raranga tere Sunahan i tamilimiou, e hana, alam ma antunan luemi ta ka tara man toukuina i puta i tamilimiou? <sup>12</sup> E nigana te mar kato uaier a palair u katuun teka i tamilimiou, kaba e niga balana tego ranga sil mei lam a manka teka i tamilimiou.

Kaba alam ema tagala silemi a manka teka. Alam e kui peise mi a limamulam a tsi monin kannou i tamulam, taraha u katuun e namots poeier alam e habulungana silemi u raranga tere Kristo tego lu menai lam ta moni.

<sup>13</sup> Alimiou e atei silemiou u katuun te kui ria tara Luman Lotu Pan e lu haser a kannou i taren tara Luman Lotu Pan. Na u katuun te pepeito kap ner a makumun haats e lu haser a hatakatana a kannou te haats ba naier. <sup>14</sup> Na e markato

has uana iesana, a Tsunono e ranga hakapein u katuun te habulungananer u Bulungana u Niga e tatei lueier a monin kannou i taren turu katuun te hengo raren. <sup>15</sup> Kaba lia ema hakats nagi a ka teka. Na lia ema koloto silegi u pas teka tego lu menai lia ta moni i tamilimiou. E niga bala nena tego mate uu lia bate poeiegu, alia u hala pukpuku railimiou u Bulungana u Niga. <sup>16</sup> Na lia ema antunan haröto has megi te habulungana mena gilia u Bulungana u Niga. E möa. E Sunahan e ranga hatagala meiou lia tego rarare u lia. Na nomi e tatei butuna i tar tegoma habulungana menai lia u Bulungana u Niga.

<sup>17</sup> Alia sanena go kato mei a toukui teka turu ngilngil peisa i tar, bate matskö talana tego lu menai lia a hihol. Kaba e Sunahan e hopö kap hakapa naiou lia tara toukui teka. E ma ngil peisa uanei i tar. E möa. U ngil i tanen. <sup>18</sup> Ga saha hihol te tatei lue gulia? A ka te niga bala nena a hihol nonei teka: te habulungana pukpuku mena gilia u Bulungana u Niga. Taraha, alia ema kato silegi a hihol te matsköna turu katuun te rarareier u Bulungana u Niga.

<sup>19</sup> Alia ema katunun kukui puku uagi ta töa ta katuun. Kaba lia e kato here nagi a peisar a katunun kukui puku turu katuun hoboto ba lia te tatei lase gou a katuun a parpara bate hamana uaier tara Tsunono. <sup>20</sup> Pöata te ka gono mera gia lia u Jiu, alia e kato has uagu te kato uaren bate las mera gien tara Tsunono. Na pöata te ka gono mera gia lia u katuun te kukutier a Lo, alia e kato has uagu te kato uaren. Alia e kato silegi a ka teka tego las meraien lia tara Tsunono, kaba lia töa



ema ongo gia tara Lo teka. <sup>21</sup> Na pöata te ka gono mera gia lia u katuun tema Jiu ri, alia e kato has uagu te markato uaren. Alia e kato here nagi a peisar a katuun tema ongo neia tara Lo tere Mosis, bate peigi mera gien tara Tsunono. Alia ema poegi alia e ka gia ielesala tara Lo tere Sunahan. E möa. Alia e ka puta noahas gia tara Lo tere Kristo. <sup>22</sup> Na pöata te ka gono meragi lia u katuun tema hamana hatagalari, alia e kato here nagi a peisar nori, bate taguhu sil ragien tegi hamana hatagala uaien. Alia e here hamanasagi a mamana turu katuun hoboto, ba lia te tatei las meragi a palai tara maroro tara Tsunono.

<sup>23</sup> Alia e kato sila nagia a manka hoboto teka tara solo turu Bulungana u Niga tere Iesu Kristo, tego lu menai lia romana a manka man niga te hatei nena u Bulungana u Niga. <sup>24</sup> Alimiou e atei sil hasemiou turu resis u katuun te pipiatar e piata hobotor, kaba a töa puku tena lue nou a prais? Alimiou go piata here hase mi, alimiou tena lue mou a prais tere Sunahan. <sup>25</sup> A katuun a hirhirata e tagala nena u ngil turu tuenrei i tanen tara mamana bate torohana silena a prais tena tia nou. Kaba a prais te piata sile rara ema antunan tia nei, e ka nitöana. <sup>26</sup> Alia ema kui pinopinogi. Na lia ema heregi a katuun te muku pinopinoena a lomolomo. E möa. <sup>27</sup> Kaba lia e hipus koru negu u ngil turu tuenrei i tar bate haka pute gen. Taraha, alia e hahatei na gou u Bulungana u Niga turu katuun tegi tagala sil menaien e Sunahan, kaba lia a töa ena mots rus ba nagen.

# 10

## *E möa tego hatsunono mena milimiou u kesa*

<sup>1</sup> A matsi hahatoulana, alimiou goma solopalemi a ka te butuia turu tuburara i manasa. U köasi tere Sunahan e kopo kap hoboto raien, na nori hoboto i tataala aroho silaia i gusuna u Tasi u Rörö. <sup>2</sup> E here nei nori i baptais hobotoia turu köasi na turu tasi bate pala tala uaier tere Mosis. <sup>3</sup> Nori hoboto i nouia tara kannou te lama i Kolö. <sup>4</sup> Na nori hoboto i ua hasia turu töa puku u ramun te hala sila naia e Sunahan turu lapo. U lapo teka nonei e Kristo, na e Kristo e la gono has meraien. <sup>5</sup> Kaba e Sunahan e raharaha noa hasir u katuun u parpara i gusuren, ba nori te mater ba tuenrei ren e tsihasa raria tara makum a palaka.

<sup>6</sup> A manka teka e haröto ranei ra tegima mate sil menai ra a manka man omi ti markato has uaien. <sup>7</sup> Ara gima hatsunone ii u kesa ti markato uu a palai i taren. U Buku u Göagono e poeiena, “U katuun i gum sil tegi nou uaien na tegi ua uaien bate takei siler tegi hirata uaien.” <sup>8</sup> Ara gima tsikolo ii na ra gima lulu tson ii ti markato uu a palai i taren ba u 23,000 turu katuun i taren e mate meier u töa puku u lan. <sup>9</sup> Ara gima torohane ii a Tsunono ti markato uu a palai i taren ba u kökötsi e kato hamate raren. <sup>10</sup> Ara gima ranga homi nai a nikaka i tarara ti markato uu a palai i taren ba angelona tara tou mate e atung hamate raren.

<sup>11</sup> A manka hoboto teka e butu sil tegi haröto meraira tegima markato uaira teka. I koloto sileien tego hatuts meraien ra a man markato teka, ara te töatöa noara te ka ria turu tsiktsiki teka te katsin kapa hamanasana a pöata.

<sup>12</sup> A katuun te poeiena e kukute hatagalena a markato a niga ega hanei sil tego kato homi uaien.

<sup>13</sup> U mamana u torohana te butuna i tamilimiou e roron butu hasna turu katuun hoboto. Kaba e Sunahan a katuun a hhipakoko na nonei ema haniga na noi u torohana te tagala bala na nou a nitagala i tamilimiou. Kaba, e Sunahan e kato bera noi limiou a maroro tego bus ba sila na milimiou u torohana ba limiou te antunan tagala na moien.

<sup>14</sup> A matsi hahikapien i tar, bus halehana ba niam a markato te hatsunono menari u kesa. <sup>15</sup> Alia e ranga gia turu katuun u atei, hakats haniga niam a ka te ranga negu lia. <sup>16</sup> Uain u göagono te ue rara bara te haniga uara tere Sunahan te gono ranou ra turu rahatsing tere Kristo, na beret te pose rara bate noe ren e gono has ranou ra turu tuenrei tere Kristo. <sup>17</sup> Ara e nou hoboto ria tara tōa beret teka, na ka teka e haharuei nena ara u katuun u parpara e katoeiera a tōa hun katuun.

<sup>18</sup> Alimiou go hakats niam te markato uaier u Jiu. U katuun te nouer a manka te haats ba ner, nori e hamaner e Sunahan te hatsunone ren turu haats. <sup>19</sup> Alia ema peigi u kesa e manana. Na lia ema pei hasegi a kannou te hala naria turu kesa a ka a kapan. <sup>20</sup> E möa! Alia e poegu a manka te haatse ria tara makumun haats turu tematan e haats uaier turu liliahanei u omi. Nori ema haats uari tere Sunahan. Na lia ema ngilegi tego hatsunono uaiam limiou turu liliahanei u omi. <sup>21</sup> Alimiou ema tatei ua mia tara kap tara Tsunono na kap has turu liliahanei u omi, na limiou ema tatei nou mia tara kannou tara Tsunono bate nou has mia tara kannou te hatsunono rari u liliahanei

u omi. <sup>22</sup> E hana! Ara ema tula menari a Tsunono tegona hiomor uaien? Ara e tagala bala naren?

<sup>23</sup> “A mamanaka e nigana tegi kato menaien,” kaba ema para nei a ka te tatei hitaguhuna. “A mamanaka e nigana tegi kato menaien,” kaba ema para nei a ka te tatei taguhu rena u katuun.

<sup>24</sup> Mōa tu hakats sil peiseiam a niniganiga i tamilimiu, hakats sil haseiam a niniganiga tara palair u katuun.

<sup>25</sup> Alimiou e tatei nouemiou a haruete te hahol naria tara tōana batema rangrangata namien. <sup>26</sup> U Buku u Göagono e poeiena, “A Tsunono te teiena a han i puta na mamanaka te kana i puta.” <sup>27</sup> Temi rangata sile na lö a katuun tema hamane nei e Kristo tegona nou gono menaien lö balö te lam, noui a saha ka te hanoue neien lö. Mōa tu rangata sei ni. <sup>28-29</sup> Kaba te poeiena a katuun, “A kannou teka i haats ba naia turu kesa,” ba lö tema noue mien. Alö toum e poeiem e nigana, kaba nonei a katuun te hateienou lö ena namots poeiena alö e kato homim. Alö goma noueien ba nonei tema hakats homi nanoi lö. Kaba lö e mar hakats toum uamou teka, “E hana balia te kukutegou u ngil tara taina katuun tego agono menai lia a kannou, te peinen, a kannou a omi?”

<sup>30</sup> Te haniga sile gula lia a kannou tere Sunahan, e hana ba taina katuun te poeiena, e omina te nou mena gilia a kannou te haniga sile gula lia tere Sunahan?

<sup>31</sup> Tara pōata te nou mia limiou na te ua mia limiou, na tara mamanaka hoboto te katoe milimiu, alimiou go katoe men tara markato te solosei menari e Sunahan. <sup>32</sup> Alimiou go hakats raiam u Jiu na u katuun tema Jiu ri na u katuun has tere

Kristo, ba limiou tema kato homi mia i mataren. <sup>33</sup>Nonei teka te torohanen markato has uagou lia. Tara mamanaka te katoe gulia, alia e torohanen kato haniga gia i matar u katuun hoboto. Alia ema hakats nagi a ka te niga peisana i tar. E möa. Alia e hakats has negu a ka te nigana i taren. Alia e kato silegu nori egi haniga be Sunahan te lu pouts ranen.

## 11

<sup>1</sup> Alimiou go kukute mumou lia temar kukute has mena gilia e Kristo.

### *U kopo turu baku tara pöata turu lotu*

<sup>2</sup> Alia e haniga ragou limiou, taraha alimiou e hakats kap namou lia tara mamanaka na limiou e kukutemiou u hihatuts hoboto tu hala railia limiou. <sup>3</sup> Kaba alia e ngilegu alimiou go atei sileiam a tson e pan nena a tahol i tanen, na e Kristo e pan rena a pal tson, na e Sunahan e pan nena e Kristo. <sup>4</sup> A tson te singona na te habulungana nena u raranga tere Sunahan bate ka mena u kopo i bakunen, a tson teka ema hatsunone nei e Kristo. <sup>5</sup> Na te singona a tahol tsi te habulungana nanen u raranga tere Sunahan batema kope nei a bakunen, a tahol teka ema hatsunone nei a tson i tanen. Nonei e markato uana tara tahol te kobana hakapa ban u hulu hoboto i bakunen. <sup>6</sup> Kaba tema kope neia a tahol a bakunen, ba nonei te tatei kobana ba nena u hulu hoboto i bakunen. Te omi nen tego kobana ba menaien u hulu hoboto i bakunen, tsi te omi nen tega kots hamakmakum menaien u hulu, nonei e tatei kopena a bakunen.

<sup>7</sup> A tson ema tatei kope nei a bakunen tara pöata turu lotu, taraha a tson u hiharöto tara nikapan tere Sunahan. Na tahol u hiharöto tara nikapan tara tson. <sup>8</sup> Taraha, a tson ema butu meia turu tuenrei tara tahol. E möa. A tahol te butu ma turu tuenrei tara tson. <sup>9</sup> A tson ima habutu sile ii a tahol. E möa. A tahol ti habutu sile ii a tson. <sup>10</sup> Na tahol ega kopi a bakunen tara pöata turu lotu bate haröto nena nonei e ka putana tara tson i tanen, taraha, u angelo e tara hase ren.

<sup>11</sup> Kaba tara Tsunono, a tahol e sola na tara tson, na tson e sola hasna tara tahol. <sup>12</sup> Taraha, a tahol i habutema turu tuenrei tara tson, na i romana a tson e butu nama turu tuenrei tara tahol. Kaba e Sunahan noahas te habutena a mamanaka.

<sup>13</sup> Alimiou peisa tego tare men. E nigana tego singo uu a tahol tere Sunahan batema kope nei a bakunen? <sup>14</sup> A markato i tarara i puta e haröto nena, ema niga nei i matar u katuun te ka menanei a tson u hulu pan. <sup>15</sup> Kaba e nigana i matar u katuun te ka menanei a tahol u hulu pan. E Sunahan e hale ien u hulu pan tega kopo kapiin a bakunen. <sup>16</sup> Te hipus nanoua ta töa ta katuun a markato teka, alia e hatei ragou limiou alam na man hun katuun has tere Kristo alam i möa ta taina ta markato tara pöata te lotu mia lam.

### *A Komunio*

<sup>17</sup> Na turu rangan hatarare teka, alia ema haniga rahi limiou, taraha te hagum hoboto mia limiou, a markato a niga ema butu nei, a markato a omi te butuna. <sup>18</sup> Alia u hengoin u raranga te poeiena: tara pöata te hagum hoboto mia limiou, ba limiou te kats kilkil namiou temar hun katuun uami limiou, na lia e hamana hats tabubegu u

ranga teka. <sup>19</sup> Alia e atei silegu ega kamei u kats kilkil i gusumilimiou, ba ra te atei sileriou esi i gusumilimiou te kukutena a markato te ngilena e Sunahan.

<sup>20</sup> Kaba pöata te hagum hoboto mia limiou, alimiou ema lu hamanemi a Komunio. E möa. <sup>21</sup> Taraha, tara pöatan nou, a man tötöa i tamilimiou e lueier a mats kannou peisa i taren bate nour, ba palai te besir, ba palai te ua hatutur. <sup>22</sup> Alimiou e ka memiou u luma. E hana ba limiou tema nou mia turu luma i tamilimiou? Alimiou e sigale miou a hun katuun tere Sunahan, bate hamatsingolo ramiou u katuun te kaka pukur. Alia go mar ranga uu ime i tamilimiou? Alia go haniga raiou limiou tara markato teka? E möa koru!

<sup>23-24</sup> U hihatuts te hale ii lia a Tsunono, te hala has ragilia alimiou. I mamina tega mateia e Iesu a Tsunono, nonei noahas tara bong ti hala naien turu pakö, banonei e lueiena a beret me haniga uana tere Sunahan, ba nonei e pose nen me poeiena, “Nonei u tuenrei i tar teka tena mate sil ranou limiou. Alimiou ena kato has uamou teka bate hakats pouts namou lia.” <sup>25</sup> Na te markato has menaien a uain i murina ti nou hakapaien, be Iesu e lueiena a kap me poeiena, “A kap uain teka e haharuei nena u rangan kits u tsimus tena kato hatagale goi lia u rahatsing i tar. Alimiou ena kato has uamou teka bate hakats pouts namou lia.” <sup>26</sup> Na tara mamana pöata te noue mia limiou a beret teka na te ua mia limiou tara kap teka, ba limiou tena haröto namiou a tou mate tara Tsunono, e antunana tena la pouts namen romana.

<sup>27</sup> Esi te nou pinopinoe nou a beret na te ua pinopino has noua tara kap tara Tsunono, nonei e kato homiena u tuenrei na u rahatsing tara Tsunono. <sup>28</sup> Hamatskö mameiam a peisa milimiou bate töan noue miou a beret bate töan ua hasmia tara kap. <sup>29</sup> Taraha, esi te nou pinopinoena a beret na te ua pinopinona tara kap batema hakats na nei ime temar mouana uana u tuenrei tara Tsunono, e las be hase nei a peisanen a raharaha tere Sunahan. <sup>30</sup> Nonei a ka te pinolasa sila ria a palai i tamilimiou, ba palai te mate haka-par. <sup>31</sup> Kaba tegi hamatskö haniga mam menaira a peisarara, bara tema tatei hamatskö raroui. <sup>32</sup> Kaba te hamatskö rena ra a Tsunono, nonei e hahuna sil raneira ara gima tatei hahuna gono merai u katuru i puta.

<sup>33</sup> Na ma tsi toular, tara pöata te gono sile mia limiou a kannou tara Komunio, ba limiou te halosemiou a tabi. <sup>34</sup> Te bes koruna a töa katuun, nonei e tatei nou mam nama i luma i tanen. Nonei ena mots nou mamna turu hagum ba limiou te lue mou a nihahuna tere Sunahan. A man tana man harangata ena hamatskö mote goulia tara pöata tena la romana guma lia i tamilimiou.

## 12

### *A manka te hala nena u Namnamei u Göagono*

<sup>1</sup> A matsi hahatoulana, alia e ngilegu alimiou go atei sileiam a man nitagala te hala nena u Namnamei u Göagono turu katuun.

<sup>2</sup> Alimiou e atei silemiou a pöata tu tematan noa mia limiou, alimiou u kukuteiam a markato ti hatsunono menai u kesa tema töatöa nei. <sup>3</sup> Na lia



e hatei ragi limiou, a katuun te ranga sila na turu Namnamei u Göagono tere Sunahan ema antunan ranga nanei, “Iesu egi korupaköni.” Na katuun tema kamenei u Namnamei u Göagono tere Sunahan ema antunan pei hase nei, “Iesu a Tsunono.”

<sup>4</sup> E kamena mamana mar nitagala, kaba u töa puku u Namnamei te hala ranen. <sup>5-6</sup> Na e ka has mena a mamana mar toukui kaba nonei noahas e Sunahan te kato hatakeiena a man toukui teka turu katuun hoboto i tanen\* <sup>7</sup> E Sunahan e hala ranei ra u Namnamei u Göagono i tanen bara te taguhu raiera u katuun hoboto. <sup>8</sup> A töa e haleri a nitagala tego ranga meien u hakats u niga, na tabi e haleri a nitagala tego habulungana menaien a niatei a niga. <sup>9</sup> Nonei noahas u Namnamei teka te halenei a tana katuun a nitagalana turu nihamana, na tabi e hala haseri a nitagalana tego kato haniga pouts menaien a katuun te ka mena a siki. <sup>10</sup> Tara tai, e haleri a nitagala tego kato menaien a man mirakol, na tai e haleri a nitagala tego ranga menaien u rangan propet, na tai e hala haseri a nitagala tego ona menaien u spirit u niga na u spirit u omi. U Namnamei tere Sunahan e hala hasenei a tana katuun a nitagala tego ranga menaien u tana u mar ranga ba tai te haleri a nitagala tego hatarare menaien ime temar mouna uana u raranga teka. <sup>11</sup> A mamanaka teka, u töa puku u Namnamei te katoenen. Nonei e halana tara man tötöa man katuun hoboto turu ngil peisa i tanen.

*A katuun a para turu töa u tuenrei*

---

\* **12:5-6:** A pal raranga teka e ranga nena e Sunahan puku lahas a töa te hala nena a mamana niatei.

<sup>12</sup> Na u tuenrei e ka has mena a mamana makum, na mamana makum turu tuenrei e noahasina te para uaren, nori hoboto u töa puku u tuenrei. Te kato has uana e Kristo. <sup>13</sup> Na u töa u Namnamei ti habaptais iara hakapan töa me katoeiera u töa u tuenrei. U Jiu, na u Grik, na u katunun kukui puku, na u katuun tema kukui puku has ri. Ara hoboto i haua raia turu töa u Namnamei tere Sunahan.

<sup>14</sup> U tuenrei ema töa puku nei a makum. E möa. E ka mena a makum a parpara. <sup>15</sup> Tego poeia u mou, “Tema ualima gia lia, alia ema pala has uagi turu tuenrei,” u mou e pala noahas uana turu tuenrei. <sup>16</sup> Na tego poeia u talinga, “Alia ema matagi na lia tema pala has uagi turu tuenrei,” u talinga e ka noahas uana turu tuenrei. <sup>17</sup> Sanena u tuenrei hoboto ega mata peisa, esi tena hengo nou? Na sanena u tuenrei hoboto tega talinga peisa, esi tena soka nou?

<sup>18</sup> Kaba u tuenrei ena markato uanei teka, e Sunahan e hakeia a mamana makum turu tuenrei turu ngil peisa i tanen. <sup>19</sup> Sanena tego ka meien a töa puku a makum, ga ime tala te kana u tuenrei? <sup>20</sup> Kaba e möa. U tuenrei e ka mena a makum a parpara, kaba u töa puku noalahas u tuenrei. <sup>21</sup> U mata ema antunan pei nei turu ualima, “Alia ema ngile gi lö.” Na u baku ema antunan pei nei turu mou, “Alia ema ngile gi lö.”

<sup>22</sup> E möa. A man makum turu tuenrei tema tagala bala nei e ka noahas mer a toukui pan i taren. <sup>23</sup> Na man makum turu tuenrei te pei rara ema niga koru nei, ara e hakopo rarien u hasobö. Na man makum turu tuenrei te hamouse rara, ara e tara kap haniga koru raren. <sup>24</sup> Kaba ara ema mar

hakats uarei teka tara man makum turu tuenrei te taratara hanigana. E Sunahan e markato menai u tuenrei tarara teka, ba ra te tarakap haniga nera a man makum te here nei ema niga koru nei. <sup>25</sup> Ba man makum turu tuenrei tema tatei hia tsugtsuga ri, kaba nori gi hia taratara kap haniga nitōani a peisa ren. <sup>26</sup> Te kamits na a tōa makum turu tuenrei, a man makum turu tuenrei hoboto e kamits gono has meren. Na te hapane ria a tōa makum, a makum hoboto turu tuenrei e sasaala gono has meren.

<sup>27</sup> Alimiou tala u tuenrei tere Kristo, na man tötōa i tamilimou a man makum turu tuenrei i tanen. <sup>28</sup> Na e Sunahan e halani a mamana mar toukui tara man tötōa tara hun katuun i tanen. Tara makum tutuun nonei e hatuolir u aposol, na tara hahuoluna a makum nonei e hatuolir u propet, na tara a hatopisana makum nonei e hatuolir u tson hihatuts, na pala te antunan katoner u mirakol, na u katuun te antunan kato haniga pouts raier u katuun, na u katuun te taguhu raier a palai, na niatei na tara toukui na tara tson mammam, na tai te antunan ranga nena u mamana u mar ranga. <sup>29</sup> Ga nori hoboto u aposol? Tsi nori hoboto u propet? Tsi nori hoboto u tson hihatuts, tsi u katuun te katoeier a man mirakol? <sup>30</sup> Ga nori hoboto e antunan kato haniga pouts raier u katuun? Tsi e antunan ranga ria turu mamana u mar ranga? Tsi e atein hatarare hoboto ner temar mouna uana u ranga? E möa, nori e ka mer a man tötōa a man toukui taren. <sup>31</sup> Kaba limiou go tagalaiam bate hasoso sile miou a man nitagala te niga balana. Na lia e harōto tala ragoui limiou a maroro te niga bala koruna.

# 13

## *A markato te hiangilngil uar*

<sup>1</sup> Tego antunan ranga menai lia u ranga turu katuun na turu angelo has, ba tema ngile gi a tana katuun, u raranga i tar e here nei a ti te ling pinopinona tsi a belö pan. <sup>2</sup> Na te ka megia lia a nitagala turu propet, na nitagala tego atei sil menai lia a mamanaka te mousuna na mamana niatei, na te ka megia lia u nihamana te tatei hasula megi lia a man pokus bate moana tu ngil tara tana katuun, alia a katuun papala tuun. <sup>3</sup> Alia e tatei hala ba negu a mamanaka hoboto i tar, na lia e tatei hala has negu a peisar batena haatser. Kaba tema ngil mena gi lia a taina katuun, a man markato teka ema taguhe noi lia.

<sup>4</sup> A markato te hiangilngil uaier e markato uana teka: u ngil ema tatei sökananei na e tuatamina, na u ngil ema tatei tara ngil nei na ema tatei hangisei nei, nema tatei ranga hapan has nei bate solo-seiena a peisanen. <sup>5</sup> Na u ngil e kato hamatsköna tara taina katuun na ema tatei hakats peisa nanei a peisanen pouts, na ema tatei raharaha boroboro nei, na ema tatei tori homi has nei. <sup>6</sup> U ngil ema sasaala menei te kato homi uaier, e sasaala las mena te kato haniga uaier. <sup>7</sup> U ngil e tagala silena mamanaka, noahasina tara saha ka te butuna. E hamanena mamanaka bate hamana silena tego butu hamana uaieren romana, na ema tatei sökana has nei.

<sup>8</sup> A markato te hiangilngil uaier ema antunan kapa nei. Kaba u rangan propet ena kapa nou, na te ranga menari u mamana u mar ranga ena kapa nou, na te ranga menari a niatei ena kapa has nou

romana. <sup>9</sup> Taraha, ara ema atei hantue rei, na ra ema ranga hantue has narei u ranga hamatskö tere Sunahan. <sup>10</sup> Kaba a ka te niga nitöana e butu nou romana, na pöata te butu nouen ba manka tema niga koru nei te kapa nou.

<sup>11</sup> Pöata tu tetenei noaia lia, alia u ranga herei a pien, alia u hakats herei a pien, na lia u katoi a markato tara niatei tara pien. Kaba pöata tu pan ia lia, alia u hanöa ban a markato tara pien.

<sup>12</sup> Taraha, i romana ara e tara hakukuhil tuun ria turu galas, kaba i murimuri ara e tara halesala korura romana. Ara e atei sil tunera ats tabubu, kaba ra ena atei haniga moto rou romana temar atei haniga sil mera rira.

<sup>13</sup> A topisa a ka teka te ka nitöana: a markato te hamana uaier tere Sunahan, na markato te hamana sil menari a manka man niga, na markato te hiangilngil uaier. Kaba markato te hiangilngil uaier te pan saluhena.

## 14

*A niatei na turu rangan propet na tara man ranga.*

<sup>1</sup> Alimiou go tagala sileiam a markato te ngil menari a tabi, na te ngil has menari a nitagala turu Namnamei u Göagono, na limiou go ngil hatagala korueiam a nitagala tego habulungana mena milimiou u raranga hamatskö tere Sunahan te ngöeri u rangan propet. <sup>2</sup> A katuun te ranga na turu tana u mar ranga ema ranga uanei turu katuun, taraha e möa ta katuun tega atei sileien. Nonei e ranga uana tere Sunahan bate katoena u rarangana tara nitagala turu Namnamei

u Göagono. <sup>3</sup> Kaba a katuun te ranga nena u raranga u hamatskö tere Sunahan e ranga uana turu katuun, ba nori te atei sile ren. Ba nonei te hatagala ranen bate hatami ranen ba te taguhu sil raneien tegi hamana haniga uaien. <sup>4</sup> A katuun te rangana turu tana u mar ranga halhal e taguhena a peisanen, kaba a katuun te rangana turu ranga hamatskö tere Sunahan e taguhu rena u katuun tere Sunahan.

<sup>5</sup> Alia e ngilegu alimiou hoboto go ka meiam a nitagala tego ranga mena milimiou u tana u mar ranga. Kaba lia e ngil koruegu alimiou hoboto go ka meiam a nitagala tego ranga mena milimiou u raranga hamatskö tere Sunahan. Taraha, a katuun te ranga nena u raranga tere Sunahan e taguhu rena u katuun hoboto turu lotu. Nonei e niga bala nena a katuun te ranga na turu tana u mar ranga. Tego kaia ta katuun tega antunan palisin u tana u mar ranga teka ba u lotu te pan susuluna. <sup>6</sup> A matsi hatoulana, tena ranga goua lia turu tana u mar ranga, ime temar taguhu mera noien limiou. Kaba te hatei ragoua lia limiou a ka te hatarei lia e Sunahan, tsi te hatei ragoua lia limiou a töa niatei na u töa u raranga u kapan na u töa u hihatuts, ba lia te antunan taguhu ragou limiou.

<sup>7</sup> Te markato has uanen tara manka tema tötä nei, a kofi tsi a gita, tema ling hamatskö rien, ba ime temar atei sil mena roi u köma te pileier? E möa tala. <sup>8</sup> Na te ling hatutuna a tuhil, ba ime temar atei sil mena roi u soldia a pöatan hiatatung hamanasa? E möa tala. <sup>9</sup> Na e kato has uana iesana i tamilimiou. Te ranga namia limiou u tana

u mar ranga te tutu ner u katuun, ga ime temar atei sil mena roien a ka te ranga nami limiou? E möa. Taraha, u ranga i tamilimiou a lomolomo pinopino. <sup>10</sup> E kamena u mamana u mar ranga u parpara i puta, na nori hoboto e ka mer te mar mouna uaren. <sup>11</sup> Na tema atei sile goi lia temar mouna uana u ranga tara töa katuun, nonei e here noi a katuun halhal i matar, na lia e here hasegoi a katuun halhal i matanen. <sup>12</sup> Alimiou e ngil koruemiou tego lu mena milimiou a man nitagala turu Namnamei u Göagono. Na limiou go torohana hatagala sileiam a man nitagala te taguhu rena u katuun tere Sunahan.

<sup>13</sup> A katuun te rangana turu tana u mar ranga e tatei singo silena a nitagala tego hatarare menaien u ranga i tanen. <sup>14</sup> Taraha, te singo gia lia turu tana u mar ranga, u namnamei i tar te singona, kaba u hakats i tar ema atei nei. <sup>15</sup> Gaha te kato tale gou lia? Alia e singo gia turu namnamei i tar, na lia e singo has gia turu hakats i tar. Alia e köma gia turu namnamei i tar, na lia e köma has gia turu hakats i tar. <sup>16</sup> Taraha te singo moalö tere Sunahan turu namnamei i tamölö, a tana katuun halhal koru ema tatei poa noi “U mana” turu hanhaniga i tamölö. Taraha, nonei ema atei sile nei aha te ranga nemölö. <sup>17</sup> Noahasina te singo haniga koru uamölö tere Sunahan kaba a nini-ganiga i tamölö ema taguhe nei a taina katuun.

<sup>18</sup> Alia e haniga uagu tere Sunahan taraha, alia e atein ranga bala koru ragou limiou hoboton töa tara palaina man ranga. <sup>19</sup> Kaba i luman lotu, alia ema antunan ranga hapara koru gia turu tana u mar ranga, e niga balana tego ranga menai lia a tsi

tabubun raranga te tatei hatuts rahi lia u katuun bate lueier a ka te ranga negulia.

<sup>20</sup> A matsi hatoulana, möa tu hakats here mi a pien. Kato here rami a galapien u tetenei te tutu ba ner a markato a omi. Kaba tara man palaina manka, mar hakats uaiam te hakats uana a katuun pan. <sup>21</sup> I mar koloto menai teka turu Buku u Göagono:

“A Tsunono e poeiena,

‘Alia e ranga mera gou u katuun i tar

bate ranga sila goua turu katuun halhal

na turu ranga halhal,

kaba u katuun i tar ema hengo noa hase roi  
lia.’”

<sup>22</sup> Te ranga menari u tana u mar ranga ema hiharöto uanei turu katuun te hamamar kaba u hiharöto turu katuun tema hamana ri. Na nitagala te ranga menari u raranga hamatskö tere Sunahan ema ka sil hase nei u katuun tema hamanari. Kaba e ka silena u katuun te hamamar.

<sup>23</sup> Na te gono hoboto ria u katuun bate ranga hoboto ria turu tana u mar ranga, ba katuun tema hamaneinei te hengona, nonei e ranga nou bate poeiena alimiou e tutu korumiou. <sup>24</sup> Kaba te ranga hoboto mia limiou turu rangan propet, ba katuun halhal tsi a katuun te hahamanana te tasuna bate hengo ranou limiou, u ranga i tamilimiou e saka korue noien bate haröte noien a man markato a man omi i tanen. <sup>25</sup> Te halakase noa a katuun tema hamaneinei a man hakats a man omi te hamouse nen, ba nonei te hatukununa bate hatsunono uana tere Sunahan ba nonei te poeiena, “E Sunahan e ka hamanana i gusumilimiou teka!”

*A maroro turu lotu*



<sup>26</sup> Aha tala tego katoeiam limiou a matsi hahatoulana? A pöata te la gögono hoboto mia limiou, a man tötöa i tamilimiu e ka memiou a man toukui. A töa e kamena u köma, na tabi e hihatutsuna, na tai e haröto nena a ka a mana, na tai e ranga nena u tana u mar ranga, na tai e palise nen. A manaka teka ego hatakei hatagala memilimiu u lotu.

<sup>27</sup> Te ngilin ranga naria a palai i tamilimiu u tana u mar ranga, ega ka puku has mei a töa tsi a huol a katuun, kaba ega ma la banai a topisa na nori gima ranga mei a töa pöata. A töa ga ranga ba tai te palisena u ranga. <sup>28</sup> Kaba te moana ta katuun tega antunan palisi u ranga, ba u katuun teka tema tatei ranga ria i luman lotu. Nori gi ranga pouts las ia i peisaren na tere Sunahan.

<sup>29</sup> A huol tsi a topisa propet e tatei ranga ner u ranga hamatskö tere Sunahan, ba palai te tatei hula habirits ner a man ranga i taren. <sup>30</sup> Te haröto nanoua e Sunahan a töa ka tara tana katuun te kana turu hagum, ba katuun te rangana te tatei hanöana. <sup>31</sup> Alimiu hoboto e tatei ranga namiu u raranga hamatskö tere Sunahan, kaba a töa e ranga mamina ba tai te ranga lenina ba limiou te tatei lu hobotemiu a niatei na nitagala. <sup>32</sup> A katuun te ka mena a nitagala tego ranga menaien u raranga hamatskö tere Sunahan e ka has mena a nitagala tego hanöa menaien u ranga turu ngil i tanen. <sup>33</sup> Taraha, e Sunahan ema Sunahan uanei tara nitutu. E möa, nonei e Sunahan tara nigumgum a niga.

<sup>34</sup> A touhaliou egi kakamotoia turu hagum turu lotu batema ranga ri. Nori egi ka putaia tara

pal tson, te ranga uana u Buku u Göagono. Te markato hoboto uaier tara man lotu hoboto tere Sunahan. <sup>35</sup> Te ngilin atei sile rien ta ka, nori ena tatei rangata raria a pal tson i taren i han. E ma niga nei te ranga uana a tahol turu hagum turu lotu.

<sup>36</sup> U raranga tere Sunahan e butu mam ia i tamilimiu? Tsi e la peisa uama i tamilimiu? <sup>37</sup> Esi te poeiena nonei e ka mena a nitagala tego ranga menaien u raranga hamatskö tere Sunahan tsi e ka mena a nitagala turu Namnamei u Göagono, nonei e tatei atei silena a manka te koloto mena gilia i tamilimiu e Sunahan e ranga mam naien i tar. <sup>38</sup> Esi tema tara marei nei u raranga teka egima tara marei hase ii.

<sup>39</sup> A matsi hatoulana, ngil hatagala korueiam a nitagala tego ranga mena milimiu u raranga hamatskö tere Sunahan, na e möa tu hapiou naim tegi ranga menai u tana u mar ranga. <sup>40</sup> Kaba tara mamanaka hoboto te katoe milimiu, alimiu go kato haniga korue men bate matsköna.

## 15

### *E Kristo e takei poutsia tara tou mate*

<sup>1</sup> Na matsi hatoulana, alia e hatakei poutsegu u hakatsina turu Bulungana u Niga tu hatei nela lia i tamilimiu. Alimiu u lu hakapeiam u Bulungana u Niga teka na limiu e tuol hakarapoto mia i tanen. <sup>2</sup> Na e Sunahan e lu pouts sila ranoua limiu, te pile hakarapoto menami limiu u Bulungana u Niga te hatei negulia, tegoma hamana pinopino bemi limiu.

<sup>3</sup> Na lia u hala rai limiou u raranga u kapan koru tu lu mami lia te markato uana a ka teka, e Kristo e mate sil a man markato a man omi i tarara, temar ranga uana u Buku u Göagono. <sup>4</sup> Na e Kristo i kahoein me takei poutsuna turu hatopisana u lan, temar ranga uana u Buku u Göagono. <sup>5</sup> Ba nonei e butuna tere Pita, bena butu hasna turu aposol. <sup>6</sup> Nonei e butu has ia tara man hatoulana a man parpara tara töa puku a pöata, u hihase i taren e tusaluhe banena u 500 tara katuun. A pal para turu katuun teka e tötöa noar, kaba palai i mate hakapa. <sup>7</sup> Ba nonei e butu lel na tere Jemis, na turu aposol hoboto.

<sup>8</sup> Nonei e butu hamurimuri koruia i tar, e herenei alia i poseia tara pöata tegima posei lia. <sup>9</sup> Alia e ka puta koru gia turu aposol hoboton töa. Ema antunanei tegi ngö menai lia a aposol, taraha alia u kato homir u katuun tere Sunahan. <sup>10</sup> Kaba tara nihitaguhu tere Sunahan ba lia temar butu uagu teka, na nikalala i tanen ema la pukpuku nei. Alia e kui hatagala bala regu a palair u aposol hoboto, kaba ema lia nei. E Sunahan te ka gono menou lia. <sup>11</sup> Ti habulungana naia lia tsi tu rarare ia lia na palair u aposol, alam u habulungana naien ba limiou te hengo miou bate hamana miou.

### *Ni taktakei turu katuun ti mate*

<sup>12</sup> Tu hahatei menai lam e Kristo e takei poutsia tara tou mate, ga taraha ba palai i tamilimiou te poeier a katuun te matena ema antunan takei pouts nei? <sup>13</sup> Te möa na ta tou takei pouts tara tou mate, bara, ge Kristo egima hatakei pouts hase ii. <sup>14</sup> Na tegima hatakei pouts menai e Kristo tara tou mate, ba u raranga te hatei nemu lam te lala puku

talana ba u nihamana i tamilimiou te moana ta nimana i tanen. <sup>15</sup> Sanena tega mana uu raranga te poeiena a katuun te matena ema antunan takei pouts nei, e Sunahan sane ma antunan hatakei pouts hase ii e Kristo, na lam sane gamo hasim tu pei menai lam e Sunahan e hatakei poutsi e Kristo. <sup>16</sup> Tema hatakei pouts rari u katuun te mater, ge hatei has nena e Kristo ima hatakei poutse ii. <sup>17</sup> Na tima hatakei tale ii e Kristo, a nihamana i tamilimiou e la pinopino talana ba limiou te ka noa has mia turu kato homi i tamilimiou. <sup>18</sup> Ba u katuun ti hamana mam ia tere Kristo, ti mate hakapa, ga i taia hakapa tala. <sup>19</sup> Ba tara nitöatöa puku teka tara han i puta bara te hamana uara tere Kristo, a nitiamana i tarara e pan bala koru nena a nitiamana turu katuun hoboto.

<sup>20</sup> Kaba u mana koru, e Kristo i hatakei poutseia tara tou mate, nonei a nitania tara tou takei pouts, e haröto nena u katuun ti mate e takei pouts has riou romana.

<sup>21</sup> A markato te mate uar e butu silama tara katuun, e Adam. Na markato te takei pouts uaier tara tou mate e butu sila hasma tara katuun, e Kristo. <sup>22</sup> Na ti mate hoboto ia ra tere Adam ara ena töatöa hoboto has roua tere Kristo. <sup>23</sup> Kaba ara a man tötöa egi hahaloso bi a pöata hamatskö i tarara. E Kristo te takei mam, ba ra te pala uaier tere Kristo te takei pouts has roua tara pöata tena la pouts namen romana.

<sup>24</sup> A kapakapana pöata e butu nou romana nonei tara pöata te hakape noa e Kristo a nikapan tara mamana tsunono hoboto na mamana nitagala hoboto, ba nonei te hala nanou a Nipepeito i tanen tere Tamanen e Sunahan. <sup>25</sup> E Kristo e pepeitokap

noahas nou e antunana te tö puta hakapa ranen u pakö hoboto i tanen. <sup>26</sup> A tou mate, nonei a kapakapana a man pakö tega hakapeien. <sup>27</sup> Taraha, u Buku u Göagono e poeiena, “E Sunahan e hakeia a mamanaka hoboto i mounen.” Kaba te pei nen e Sunahan e hakeia a mamanaka hoboto i mouna e Kristo, e hatara mareinena e Sunahan a töa ema ka neia i mouna e Kristo. <sup>28</sup> Na pöata te ka hakapana romana a mamanaka hoboto i mouna e Kristo, ba nonei has a Pien Tson tere Sunahan te haka hasena romana a peisanen i mouna e Sunahan, be Sunahan te tsunono pan nanou a mamanaka hoboton töa.

<sup>29</sup> Ga ime te markato ua nen. U katuun te luer a baptais tegi taguhu meraien u katuun ti mate hakapa e lu silerien aha? Tema hatakei pouts rari u katuun ti mate, u katuun e baptais sil rari aha tara solo ren. <sup>30</sup> E hana bara te haka nitöa raria tara niomi a para? <sup>31</sup> Alia e mate nitöagu turu mamana u lan a matsi hatoulana. U mana koru alia e sasaala korugu ba lia te rangan hangisei mera gou limiou, u hangisei te kato hasegia lia tere Iesu Kristo a Tsunono i tarara. <sup>32</sup> Sanena lia tu hiatatung peisa mei a nitagala i tar, gono mer u enimol u hie ra i Epesis, alia ena lui gou aha? Tema hatakei pouts raroia u katuun ti mate,

“Aragi töa nou bate uara,

taraha i mahö bara te matera.”

<sup>33</sup> Möa tu hengo koruiam. “Te hikapien gono mera moa lö u katuun te omir, ba lö tena omi hasi mou.” <sup>34</sup> La pouts muma turu hakhakats u haniga bate hanöa ba namiou a man markato a man omi taraha a palai ema atei sil noeri e Sunahan. Alia e ranga sila gia tara nimatsingolo i tamilimiou.

*U tuenrei te takei pouts noua tara tou mate*

<sup>35</sup> A töa ena rangata nou, “Ime temar takei pouts uanou a katuun te mate? U sahu mar tuenrei te takei menoen?” <sup>36</sup> Ba lia te pei gou, alö a katuun a tutu. A ka te haleba nemölö e mate buna bate töan pusuku nama. <sup>37</sup> Na tara ka te haleba nemölö, alö ma haleba namoi u tuenrei tena butu nou, e möa, a ngal tuun, te markato uana turu koun tsi a man taina a man mar ngal has. <sup>38</sup> Kaba e Sunahan e hale neien u tuenrei turu ngil peisa i tanen, na tara mamana a mar ngal e ka mena u tuenrei peisa i tanen.

<sup>39</sup> U tuenrei ema markato uanei iesana, e kamaena u töa u mar tuenrei tara katuun na u töa u mar tuenrei turu enimol na u tana u mar tuenrei turu apena na u tabi turu iena.

<sup>40</sup> E kamena u tuenreina i kolö na u tuenreina i puta, na nitaratara turu tuenreina i kolö a töa ka, na nitaratara turu tuenreina i puta a taina ka.

<sup>41</sup> A pitala e ka mena u ualesala peisa i tanen, na tsihou e ka has mena u ualesala peisa i tanen, na pitopito has e ka mena u ualesala peisa i tanen. Na u ualesala tara man tötöa a man pitopito e halhal hasina.

<sup>42</sup> Na e kato has uana iesana tara pöata te takei pouts roua u katuun. U tuenrei te kaho ner e tia nou romana. Kaba u tuenrei te hatakei poutseier ema tatei tia noi. <sup>43</sup> Tara pöata te kaho naria u tuenrei tara katuun, nonei ema tagala nei nema tara haniga nei. Kaba u tuenrei te hatakei poutse riou e tagala koruna na e tara hanigan töa nou.

<sup>44</sup> U tuenrei tuun te kaho ner, kaba u tuenrei u tsimus te hatakeier romana. Te kana u tuenreina turu tsiktsiki, u tuenrei na turu namnamei e ka

hasina. <sup>45</sup> I mar koloto menai teka turu Buku u Göagono, “A Adam tutuun, e butu mema u namnamei u töatöa.” Na Adam te butu hamururima, e Kristo, e butu mema u namnamei te hala nena a nitöatöa. <sup>46</sup> Ema tuenrei nei turu namnamei te butu mamima, kaba u tuenreina turu tsiktsiki te butu mamima, be murinen ba u tuenreina turu namnamei. <sup>47</sup> A Adam tutuun i katoe ii u tsikt-sikina i puta. Kaba a hahuoluna Adam, e Kristo, nonei a Tsunonona i Kolö. <sup>48</sup> U katunura i puta te hereri nonei a katuun te katoe ii e Sunahan u tsiktsiki. Na u katunura i Kolö te hereri nonei a katuun te lama i Kolö. <sup>49</sup> Ti mar posa has meraira, ara e herei e Adam, a katununa turu tsiktsiki, na ara e here haserei romana e Kristo, a katununa i Kolö.

<sup>50</sup> Alia emar ranga uagu teka a matsi hatoulana: u tuenreina turu tsiktsiki ema tatei la uanei tara Nipepeito tere Sunahan na u tuenrei te tia nou ema tatei la uanei tara han turu tuenrei te ma tatei tia nei.

<sup>51</sup> Hengoiam! Alia e hatei ragi limiou aman raranga te mous: ara ema mate hoboto roi, kaba ra hoboto e palisira romana. <sup>52</sup> Ara e palis boroboro tuun here rei romana te mitskaloho uana u mata, tara pöata te pihun nönöana romana a tuhil. Aa, a tuhil e lingina romana, ba u katuun ti mate te lu berari u tuenrei tema tatei tia nei i kolö na ra has u katuun tema mate noa rei e palis has riou nonei tara pöata. <sup>53</sup> Taraha, u tuenrei teka te mate nou ega palis uu turu tuenrei tema tatei mate nei romana. U tuenrei teka te koreme nou ega palis uu romana turu tuenrei tema tatei koreme nei. <sup>54</sup> Pöata te palisna romana u tuenrei i tarara te tatei matena, ba u raranga ti kolotein turu Buku u

Göagono te butu hamanana: “A tou mate e kapa. E Sunahan e tagala saluhe hakapa.”

<sup>55</sup> “Ime te kana a nitagala tara tou mate?”

Ime te kana a nikamits tara tou mate?”

<sup>56</sup> A nikamits tara tou mate, a markato a omi, na markato a omi e luena a nitagala i tanen tara Lo tere Mosis. <sup>57</sup> Kaba ragi haniga uu tere Sunahan te hala ranei ra a nitagala tere Iesu Kristo a Tsunono i tarara tegi tagala saluhe uu ra.

<sup>58</sup> E markato uana teka a matsomi koru i tar, tuol hakarapotoiam, bate tagala miou, möa tu hasula ba naiam e Sunahan. Kui hatagala nitöa mia tara Tsunono, taraha alimiou e atei silemiou a toukui te katoe mia limiou tara Tsunono ema lala puku noi.

## 16

### *A monin hitaguhu turu katuun tere Sunahan*

<sup>1</sup> Turu rarangana tara moni tegi taguhu merai u katuun tere Kristo, alimiou e markato uamou tu mar ranga merai lia u katuun tere Sunahan i Galesia. <sup>2</sup> Turu mamana u Sandei, alimiou hoboto a man tötöa e haka halhale mou a hapalana matsi moni i tamilimiou, antunana temar lu uami limiou. Haputeiam ba limiou tema gonemi romana ta moni tara pöata tego la uu lia i tamilimiou. <sup>3</sup> Ba tara pöata tena tuku gia romana lia, ba lia te hala regu u katuun tena haniga ramou limiou ba nori te söater a monin hitaguhu teka, a man pas tena haröto nena nori u katunura i tarara, bate lauaier i Jerusalem. <sup>4</sup> Na tega niga uaien alia go la has, ba nori te tatei peige riou lia.

*U hirari na tara tou lala tere Pol*



<sup>5</sup> Alia e la mam buagou i Masedonia, ba lia te tōan la uagou i tamilimiou. <sup>6</sup> Alia ena ka gono toum mera goulimiou e antunana tego kapaia a pōata tara eihalata. Ba limiou te tatei taguhe moulia tego la lel uu lia tara tou lala i tar. <sup>7</sup> Alia ema ngilin tara meragi limiou ats tabubun pōata puku, alia e ngilin ka halehana gono mera goulimiou, temar ngil uana a Tsunono.

<sup>8</sup> Kaba lia e ka mam goua i Epesis e antunana tara pōata turu Pentikos. <sup>9</sup> Taraha, a tamana e takalata hapan talana tego kato menai lia a toukui a niga teka, na katuun a parpara te katsin kato homier a toukui tara Tsunono.

<sup>10</sup> A pōata te tukuna romana e Timoti hateiam, e möa ta ka tego matouteien i tamilimiou, taraha nonei e kuiena a toukui tara Tsunono te kui hasegu lia. <sup>11</sup> E möa koru tego tor tsuga menaien ta töa i tamilimiou. Taguheiam bate hala gono memien a masalohana tara tou lala lel i tanen, ba nonei te kopis pouts uanama romana i tar. Taraha, alia e hahalose gen tega kopis pouts gono mera men a palair a man hatoulana i tarara.

<sup>12</sup> Na tere Apolos, alia u ranga hatagala koru meien tegana tara gono meraien limiou a palair u hatoulana. Kaba nonei ema hakatsin la noa namei. Nonei ena la nama romana tega ka meien ta pōata.

### *Urarangan hanhanöa*

<sup>13</sup> Kahete kap nitōaiam, bate tuol hakarapoto mia tara nihamana i tamilimiou. Möa tu matout iam, hatagala kakap nitōaiam. <sup>14</sup> Katoeiam a manaka bate kato memien a tui milimiou.

<sup>15</sup> Bara a matsi hahatoulana alimiou e atei silemiou e Stepanas na pal katuun i tanen. Nori u katunura i Gris ti hamana tutuun uu tere Kristo. Turu ngil peisa i taren ba nori te taguhu koru rer u katuun tere Sunahan. <sup>16</sup> Alia e ranga hata-gala meragou limiou go kui gono meraiam u mar katuun teka na palai hasir u katuun te kui gono mera ren.

<sup>17</sup> Alia e sasaala koru megu ti la uama ere Stepanas mere Potunatus ne Akaikas. Taraha, nori i la tupu naiema tima la uamumei limiou teka. <sup>18</sup> Nori i kato hatagali a torir na torimilimiou has. Alimiou go tara marei raiam u mar katuun teka.

<sup>19</sup> U katuun tere Kristo tara provins i Eisia e hala rari limiou u hanhaniga i taren. Ere Akuila mere Priska na u katuun tere Kristo i luma i taren e hala has rari limiou u hanhaniga u nigan tōa tara solona a Tsunono. <sup>20</sup> A man hatoulana hoboto teka e hala has rari limiou u hanhaniga. Alimiou go halemi a man tötōa i tamilimiou a nihanhaniga a göagono.

<sup>21</sup> Alia e Pol te koloto peisegi a limar u hanhaniga teka.

<sup>22</sup> Esi te rama nena a Tsunono, egi korupakö ni. O Tsunono i tamulam, lama!

<sup>23</sup> A nihitaguhu tara Tsunono e Iesu e tatei ka gono mera noulimiou.

<sup>24</sup> Alia e hala ragi limiou hoboto a niniganiga i tar te hamana hoboto uara ra tere Iesu Kristo. U mana.

Alia e Pol

**U BULUNGANA U NIGA**  
**The New Testament in the Halia Language of Papua**  
**New Guinea**  
**Nupela Testamen long tokples Halia long Niugini**

copyright © 2020 Bible Society of Papua New Guinea and Wycliffe Bible Translators, Inc.

Language: Halia

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-08

---

PDF generated using Haiola and XeLaTeX on 11 Nov 2022 from source files dated 5 May 2022

03815460-d6a0-5a59-aa7b-2a4278f7e67d